

水縮水跡去江隄甚遠而水勢又北出順利  
境內至無所瀦蓄故又於京口置閘啓閉令  
不得盡洩於江自是漕河之水與鎮江境內  
之水自相吐納

鎮江府城地勢至北益高去太湖遠無所通唯  
漕渠自嘉興歷蘇常直北流入於鎮江界中  
抵京口通江淮耳然渠自京口逕夾岡勢繚  
曲皆鑿山爲之而瀦水少故宋時於京口呂  
城下礎石爲渠兩涯置閘以障內外之水時  
其鍾泄而又與丹陽之練湖相通

金壇西北則有西洋河上受長山三茅諸山之  
水繇十字河以入漕河漕河之東復分流入  
長蕩河

漕河又直流爲穿城遶城二渠繇縣南壩與後  
陽于南堰河注東墟崑崙二橋合流入白龍  
蕩出方洛港而注長蕩湖